

De Unglickstach

Es muß nit grad de 13. sin, wann em so e Unglickstach bevorsteht! Es kann e eenfache Tach uner der Wuch oder gar e Sunntach sin. Wann bei mir es Unglick an de Himmel kummt, dann is Polen verloren. Es reist eenfach nit ab.

Am vergangene Sunntach sin mer ufgstann un han schun vor em Frühstück anfang uns zu kepple un zu zänkre. Weger was, des is eenerlei. Doch es war e Bagatell. Mich macht so e Zänkrerei fix un fertich, ich han immer geere Ruh im Haus. Awer wann ich in Rawasch sin, kann ich eenfach nit ruheere, bis ich mei Pfefferkheere abgin. Un wem sunscht, als meim Kumrad.

Kaum han mer zumorjet gess ghat, is mer die Kaffeeschal runergfall un in lauter kleeni Sticker verboch. Natierlich is die Streiterei weitergang, weil ich tappich sin un alles zu Scherwe schlaa, was ich in die Hand hol - des hat mei Mann behaupt. Er hat sich angezoo un hat gsaat, es raicht. Er geht spaziere. Weil ich hätt des Ganzi an dem Sunntach iwertrieb un er muss frisch Luft schnappe, sunscht....

Kaum war er wech han ich im Hol mit eem nasse Fetze ufwische wille. Im Wech han mer zwaa volli Flasche Mineralwasser gstan. Wie ich die mit de nasse Pratze wechstelle han wille, sin se mer aus de Händ geritscht, uf die Gresie gfall un verboch. Nit nor dass ich jetz in dem Wasserlacke rumgetappt sin, ich han die Scherwe un Splittre doch zammraffe misse. Sin ich natierlich ausgeritscht un han mitm Hinnre im Wasser un eem Splitter ghuckt. Wann er jetz in der Näh gewenn wär... oh maiko, do were noch meh Schwerwe gfloh!

Wie ich endlich Ordnung ghat han, schau ich uf die Uhr, es war heekshti Zeit, mich ans Mittachesse zu mache. Wie ich die Krumber brote han wille, hats Eel gspritzt un ich han mich so verspritzt, dass ich an alli zwaa Händ e dicki Bloodre ghat han. Sogar es Gsicht un de Hals han was mitkriet. Jetz han ich mich uf de Stuhl gsitzt un bitterlich zu kreische anfang. Grad noh war de Spaziergang beend un de Kummentar is losgang: "Han ich der nit gsaat, du sollscht sunntachs oder feiertachs nit ufwäsche? Des hascht dervun. Lee dich ufs Ohr, ich mach es Esse fertich!" Grad so, wie wann mer ganz eenfach tun meeht, wie wann nix passiert wer!

Am Nohmittach han ich Gusta uf Kuche kriet. Natierlich han ich kenne gebackt an dem Sunntach. Doch mei Mann hat Mitleed ghat mit mir un is in die Kondi. Er hat mer Savarina gebrung. Zwaa Stick. Wie ich die heisshungrich verdrickt ghat han, is es mer schlecht gin. Un ich han die ganzi Nacht laafe misse!

E Unglick kumm selten alleen! An dem Sprichwort han ich heit noch zu knawwre!